


洋学文庫
文庫 8
D 288
5



文庫 8
D 288
5

中西紀事卷之十三

粵民義師

道光二十一年夏粵東義民創洋人於蕭關三元里見六卷遂起團練之師始自南海番禺而香山新安等縣繼之紳民喋血丁壯荷戈誓與英人爲不共之仇踰年聞白門撫事定弗善也未幾者英任兩廣總督伊里布任廣州將軍黃恩彤自江寧藩司升授粵撫三人者皆前在江寧同預於撫事之約英人來往粵東方挾之以爲質粵之紳民獨執通商舊制起而爭之初粵東開港始於乾隆之中葉定制以澳門爲貿易之區以黃埔爲卸貨之地洋商交易事竣仍押回澳門住冬不得逗留省城洋行擅自出入至五十八年英人來貢請撥給

江上蹇叟

F 39- 7728

010190620021



廣東附近省城小地方一處畀該商寄住奉

敕諭向來西洋各國洋商居住澳門貿易畫定住址地界不得逾越尺寸其赴洋行發貨洋商亦不得擅入省城用以杜華洋之爭論立中外之大防等因載入粵東檔案嗣以壬寅之役挾兵要撫所議通商各款內有省城設立棧房及外洋領事入城之約於是寧波上海等處出入自便而福建以福州爲通商馬頭遂於省城烏石山上起造洋樓大府與之修來往晉接之儀粵人聞之謂洋人向不准入城爲

天朝二百年來例禁况五口通商粵東但有澳門不聞廣州也爰合詞懇於大府請申洋商入城之禁不省乃大集南海番禺之紳士耆老傳遞義民公檄議令富者助餉貧者出力舉行團練按戶抽丁除老弱殘廢及單丁不計外每戶三丁抽一以百人爲一甲八甲爲一總八總爲一社八社爲一大總旬日之間城鄉鎮集燈楮旗布爲之一空自是衆議洶洶不藉官餉亦不受地方官約束薰蕕雜處重之以柄鑿浸浸乎與官爲仇矣壬寅議撫之次年濮鼎查至粵請入城見制府粵民不可濮方逞志金陵懼以此偶挫其銳遂逡巡去二十五年洋艘至粵首請入城見制府制府難之其年冬十二月英酋復以相商事件請入制署耆相乃遣廣州府知府劉瀚登洋舟謂將曉諭軍民訂期相見粵人偵知之遂於城廂內外徧張揭帖約以洋人入城之日閉城起事適太守自洋船速賓歸騶從前導有擔油者攔坐輿過弗避也隸觸而汙焉又捽其髮而當階答之市人譁而言曰官方清道以迎洋鬼其以民爲魚肉也一時烏合之衆乘釁而起太

守回署則堂皇嘯聚數千人闖入宅門內劫取太守衣笥陳之堂下破其鏹搜其朝珠公服而焚之曰彼將事洋人不復爲大清官矣太守自後院毀垣出奔告制府制府懼激變亟出示安撫之軍民乃散旋揭帖議槍劫城外十三洋行洋酋遂逸去維時廣州人益自得遇洋人登岸輒多方窘辱之洋人不堪反以爲大吏之發蹤指示也則數數貽書譙讓之大府不能辯而恒懼粵民之敗撫局無計以消弭之謀於粵中之紳士則曰此衆怒不可以說動也又曰吾鄉之民能爲

國家効力不願從撫也若制府將軍一朝令於國中示以能執干戈禦外侮者受上賞某雖不武前驅陪從惟命之從大府卒無以難也伊相在廣州以憂死者相旋密謀於首揆得

旨內召於是粵人乘間以翻撫事之局洋人入城之議卒不果行

二十六年粵撫黃恩彤被劾罷歸時徐廣縉起復入都自藩司升授粵撫葉名琛亦以是年之冬授粵東藩司踰年者相內召授徐廣縉爲兩廣總督葉名琛爲廣東巡撫先是英人堅執白門前約數請入城者相以粵民爲詞請徐圖之及相國內召洋人以其管轄五口又原議撫事之大臣固請定入城之約而後去於是相國謾語英官期以二年之後當踐前約英官復要以據情入告許之

昔見咸豐七年香港新聞紙內稱道

光年間曾定有二年後入城之約初以爲相國佯許之詞及見粵人所撰廣州紀事則云洋人要相國奏請二年後入城又核之許祥光所致西書則二十六年間者相將去粵東事也

自相國去後英人自恃其積年之狼亢見後至者以爲土室懦夫易而侮之又見昔年之預撫局者先後去粵其所要求更有出於所議之外者遂復以入城相商照會制府制府不答粵之紳士乃

乘間說曰番舟每歲一至悉索敝賦公等能終事之乎不能則需者事之賊也今吾粵之耽耽者皆在洋人矣若明公投袂一呼則負杖入保者皆至何求而不克二十九年已酉英舟至粵復請入城與制府議事制府辭之即乘舟出虎門外親詣洋舟洋官出其所求通商各款並申二年入城之約制府不答回至會城密與撫軍畫戰守策時則南海番禺各鄉團練之師先後並至紳士請師期制府告曰洋人志在入城不許則必挾兵以要我先守後戰曲在彼矣越日洋舟闖入省河連檣相接輪烟蔽天制府復單舸前往諭以衆怒不可犯洋官謀質制府舟中以要入城之請俄而省河兩岸義勇呼聲震天洋官大懼乃以罷兵修好請自此不言入城事制府窺其妄念已息復溫言撫之遂開艙互市如初事畢據情入告

成廟方悟粵東民情之可用而前此諸臣皆以交臂失之覽奏欣慰奉

上諭洋務之興將十年矣沿海擾累糜餉勞師近年雖略臻靜謐而馭之之法剛柔不得其平流弊以漸而出朕深恐沿海居民有蹂躪之虞故一切隱忍待之蓋小屈必有大伸理固然也昨因英人復申粵東入城之請督臣徐廣縉等迭次奏報辦理悉合機宜本日又由驛馳奏該處商民深明大義捐資禦侮紳士實力匡勸入城之議已寢該洋人照舊通商中外綏靖不折一兵不發一矢該督撫安民撫外處處皆抉摘根源令該洋人馴服無絲毫勉強可以歷久相安朕嘉悅之忱難以盡述允宜懋賞以獎殊勳徐廣縉着加恩賞給子爵准其世襲並賞戴雙眼花翎葉名琛著加恩賞給男爵准其世襲並

賞戴花翎以昭優眷發去花翎二枝著卽分別祇領穆特恩烏蘭泰等合力同心各盡厥職均著加恩照軍功例交部從優議敘候補道許祥光候補郎中伍崇曜著加恩以道員儘先選用並賞給三品頂戴至我粵東百姓素稱驍勇乃近年深明大義有勇知方因由化導之神亦其天性之厚難得十萬之衆利不奪而勢不移朕念其翼戴之功能無惻然有動於中者乎著徐廣縉葉名琛宣布朕言俾家喻戶曉益勵急公親上之心共享樂業安居之福其應如何獎勵及給予扁額之處著該督等第其勞勩錫以光榮毋稍屯膏以慰朕意餘均著照所議辦理該部知道欽此是役也論者謂平西域張逆以後之曠典而

成廟謂前此諸臣主剿旣失機宜議和復無把握特加二臣封爵以愧厲之然實粵民團練之師先人而奪之者也維時粵東有好事者播散流言將欲乘勝沮其通商之局英之公使文翰者聞而懼焉貽書制府請重定粵東華洋通商之約於是粵之士言於制府曰洋人覬覦入城誤自白門之約未經顯揭耳今必欲以粵東專約請者須首嚴洋商入城之禁載入約中以杜其異日復萌之漸文見衆怒洵洵不敢堅執遂蒞盟粵人又要以出示曉諭洋商恪遵新約亦許之制府據以奏聞載入檔案自是英人在粵者稍稍斂戢相與休息者數年

咸豐六年英人以執舟子事起釁見後謀入粵城面見制府訴其事制府辭之時葉名琛以大學士任兩廣總督當道光戊申己酉間與英重定粵東之約相國預焉至是粵人執前約及英人示諭洋商不

准入城載入新聞紙者上書爭之

新聞紙係西人自撰粵人恐其日久背約勒令載之新聞紙中以為他日左券

英人在粵之領事巴夏里者以舟子事教唆水師提督西某及來粵之公使包某欲藉以破入城之約屢由公使致書相國謂壬寅請款凡領事官有相商事件得於地方官衙署相見自粵東禁止入城以來傳言誤聽壅閼不通請仍循江寧舊約以通中外之好不省於是西水師與兵攻沿河礮臺遂窺省會粵人請率團練義勇入城保相國諫曰洋人啓釁志在進城今藉端滋事本部堂援前約反覆開導彼終不聽然本部堂必堅執前約不能曲從其請也爾等勿復驚疑宜一心堵守同仇敵愾是年九月英人攻城不克十一月又移兵攻近城礮臺粵民守城見敵勢猖獗烏合之衆思洩其憤藉以牽制英師於是積薪灌油火烈具舉毀英人在洋粵洋行凡六一時洋艘之

至粵者被義勇沿河截擊或傷其船主或擊其舟人大府弗能禁也方洋行被火之後有火輪船一尾繫一划艇載其灰燼之餘所拾珍玩重器自省河駛至虎門夜半突有華艇百蟻集於前開礮轟擊火輪船見勢急斷划艇繩索而走遂為粵民所奪英人不勝其憤馳告本國主請再遣公使入粵並帶兵船與大府理論七年英使額羅金至粵兩致書相國不省遂糾佛郎西彌利堅俄羅斯三國之兵合從攻粵粵民以連年構衅端大府出示禁止以為官之陽勦而陰撫也又見英人屢致書於大府大府秘不宣示疑其別有請託於是紛紛解體各謀自衛之計是年十二月英人糾佛兵再攻粵城克之粵之北門外有九十六鄉即昔年創洋人於三元里者聞粵省陷銳意恢復募勇團練而佛山鎮之義師起

八年春粵紳大會南海番禺之義民設團練局於佛山鎮主其事者侍郎羅惇衍翰林院編修龍元僖給事中蘇廷魁也英佛據城附郭之民多不附者而北門外之九十六鄉素與洋人爲仇各謀保衛之計首嚴清野禁絕漢奸又聲言洋人入其界者登時格殺弗論英佛聞而憚之正二月間侍郎等親赴各鄉團練得數萬人揚言戒期攻城城中兇懼是時將軍都統皆在城中英人防其內應悉收駐防兵械脅旂民而降之司道聞佛山起義間行而逃惟巡撫被洋兵防守不得出初中西不睦地方官出示禁止華人受雇外洋供其服役迨省城陷後英人逼令巡撫出示諭以中外講和不日罷兵通商爾等凡有在麥高香港等處

麥高與香港對洋香港在珠江口之北麥高在珠江口之南其民多仰食於外洋者

爲英法署

中辦理文案及受雇服役人等

法與佛同西人

遵前示辭退者仍速回

原署照舊辦理毋得心懷疑慮觀望不前等因

據西八月報係七年十一月蓋即破城後事

佛

山紳士聞之謂中西之衅實起自漢奸向來違抗封艙之案必先撤其沙文使之供應窘絕遂於三月間由局中出示令粵中各府縣鄉村耆老首事通飭民間男女有在香港麥高等處爲外洋人教書辦理文案及一切雇工服役人等限一月內稟行辭退回家有不遵者收其家屬無家屬者繫其親族於是漢奸兇懼一月之內告歸者二萬餘人洋人身司炊爨不堪其苦以告領事巴某巴言非破佛山之局不能挽回然水師提督當赴天津時曾戒諭在粵兵丁毋得與粵人挑戰今日之事非我所得專也無已且以弛禁告遂由巴領事出示曉諭華民言現經公使水師提督在天津與大清議和好不日即可通商爾等仍各還原業即地方官亦應仰體

皇上之意毋再阻撓致激他衅云云遣火輪船一隻前往新安鎮張貼間有鄉勇伏發殺傷洋人數名貼示者係新安地方之民亦被殺其麥高之示交與駐麥高之洋官轉達於香山大尹聞新安事發亦中止英法之在省者聞其事因起兵攻新安陷焉佛山之局紳民同心聲勢響應惜不能成紀律之師故築室多謀而攻城鮮效繼以天津之役滬上之行執政主和疆臣觀望紳民之掣肘愈甚而克復無期矣

是年六月天津撫議成

上飭大學士桂良尙書花沙納等至滬商定稅則事宜八月欽差到上海英之公使額羅金後至請罷撫議緣是時英佛在粵方攻陷新安侍郎等請緩撤團練之師而英人謂天津定和早已知會入粵何以紳士羅某等仍在粵中招勇且徧張賞格謂有能得巴領事之首者賞銀三萬兩又復開礮傷斃我國兵丁致有新安之役請問是何意見等語蓋是時粵人見和議已成該洋人仍復占居省會軍民憤憤因有偽造

廷寄謂英法心懷叵測

上已密飭羅惇衍等相機攻勦額羅金到滬方接駐粵洋人照會之文咨送欽使查辦必欲撤回黃總制及三紳士團練之兵方肯定議欽使據以奏聞十二月二十七日奉

上諭本日據桂良等呈奏英國咨文各件內有偽造廷寄諭旨一道據稱係英國人得自廣東者披覽深爲詫異中國自來撫馭各國一秉大公從無設計暗害之事自葉名琛失事後命黃宗漢爲兩廣總

督接受欽差大臣關防原以保守疆土卽侍郎羅惇衍等激於義憤團勇自衛亦紳士應辦之事迨桂良等在天津和議已成黃宗漢專辦本地軍務羅惇衍等亦遵旨專辦土匪並無與英佛二國交兵之舉該國現雖尙未交還廣東省城但能約束兵丁不擾居民自可相安無事乃有偽造廷寄令羅惇衍等與該二國爲難以致洋人疑慮著黃宗漢嚴拏偽造之人盡法懲辦使各國皆知中國辦事光明正大一經定議盡釋嫌疑造言生事之人無從煽惑至上海現辦通商事宜粵省相距較遠著卽授兩江總督何桂清爲欽差大臣辦理各國事務所有欽差大臣關防著黃宗漢派員齎交何桂清祇領接辦欽此是時桂相等力主和議委曲調停而該洋人肆其桀驁必欲請旨查辦以釋前疑於是粵人銳意恢復之懷一旦爲之奪氣矣

按粵東義勇犷悍成風當洋人未擾之先械鬥搶劫之案層見迭出州縣緝犯非特其竄海及逃踞山谷間弗能致也卽廉得其實而差不敢捕營兵不敢協緝欲以規脫處分不過改竊買抵完案而已當其招聚亡命不敢無故稱兵以抗官吏之顏而其驍輕猛暴之氣未嘗不思藉手以試其能迨洋氛漸近則皆欲以有名之師報不共之仇故三元里之役一朝而嘯聚者百有三鄉惜粵中大吏不能鼓而用之也撫事旣定義勇無所得餉則去而爲盜於是內訌外患之交乘而粵事日棘矣徐葉二臣皆以詞科清望出膺節鉞觀其設施之前後抑在東平長者坐不闕堂之輩而殊勳懋賞乃得自義勇團防之推戴一朝膺蒲穀之錫專制嶺海間比於古之藩鎮不亦身與名之兩全乎然其始也以攘敵得功其繼

也卒以和戎取禍當英人致書狂悖葉相不能率粵中團練與聞罪之師乃欲以包荒示羈縻以靜鎮安反側一旦禍起燎原噬臍莫及遂爲衆怨之所歸昔義律索香港於琦相照會往返陽拒而陰許之粵人懲往事遂以此持相國短長迨見西書三致不宣不答蹤跡詭秘不能無苞苴竿牘之疑遂相率而解體甚矣處事一不當而身與名之俱裂也悲夫

已酉之役不發一兵不折一矢而洋人斂手易倨爲恭遂寢入城之議予未見原奏以爲宜僚弄丸而解兩家之難酈生掉舌而下七十餘城今粵東義師以先聲而收後實之效意必有在粵之巨室排難解紛如魯仲連其人者越數年番禺許星臺太守應鑠同官江右詢之則當日主持其間者實太守之老阮也越日持其世

父廉訪公行狀示予則此事之顛末悉具焉其略云先是耆相國因英官固請入城曾有二年之約未幾相國內召中丞徐公膺制閩方伯葉公晉撫軍已酉仲春英官文翰申前議請如約公力言洋人貪得無厭不宜曲徇所請粵省雖五方雜處然民知向義可以鼓舞振興使之互爲保衛制府然之公乃親詣各鄉申行團練嚴定章程不閱月而得十萬之衆又倡捐集資數十萬軍聲大振方欲乘此爲先發之制禁其互市羈其沙文而公以爲未可乃倡率諸紳先馳尺一之書布告英官導以大義其略曰蓋聞事不深思終貽後悔人無遠慮必有近憂天下事有始意以爲可行而後終不能行者有常情以爲易行而其勢又實難相強者如貴公使與我大憲所議入城之事是也前年貴國德公使堅請入城之

議者相國定約兩年之期此安知非相國深知其難而姑緩其期以爲一時權宜之計乎又安知非德公使明知回國預存卸責之見而欲諉其過於後來受代之人乎不然則入城之事無待再計而決何難即日舉行而必待至兩年之後耶或謂粵省通商二百餘年各國遠人皆在十三行居住城外旣無閩華洋則入城又何分畛域不知省會之地民居稠密良莠不齊往往倚主陵客遇事與波於是閩人之積憤生事者有之土匪之乘機搶劫者有之民情習俗均非上海福建之可比此貴國人所共知也今貴公使膠執前約而不深思遠慮者不過欲以貴國體面夸耀於人以爲入城則榮不入城則辱耳不知無端而招衆怨舉足而蹈危機是慕虛名而賈實禍求榮反辱智者必有所不爲也或又謂不許貴公使入城乃素不安分之徒藉以蠱惑衆心賴官紳有以彈壓而開導之抑知民情之真僞非可徒託空言也卽如貴國所與交易之疋頭棉花等行戶皆安分營生之良民彼以鉅萬之血本而謀利若歇一日之業卽虧一日之資何以一聞入城之議遽停貿易不約而同誰使之然耶今城廂內外家家團勇戶戶出了合計不下十餘萬人而且按鋪捐費儲備經費合計不下數十萬金豈盡爲防禦土匪而設苟非衆志成城何以一聞入城之議踊躍樂從不謀而合又誰使之然耶此皆民惟一心衆怒難犯之明證固非大吏所能強而齊之又豈刑法所能禁而止之也乃外洋紛紛傳說有謂貴公使如不能入城必將興兵構怨以圖一逞此尤不可信何者二十一年之結怨與師貴國有激而成所關者大實出於不

得已今爲此小節輕動干戈若祇以現在香港二三千之衆而抗全城數百萬之人則衆寡不敵若遽調各港之兵且科衆商之餉則因小失大愚者亦不屑爲現今匪徒覬覦生心動藉公憤爲口實萬一釀成焚燒洋樓之事殃及各國遠人玉石不分咎將誰諉黃竹岐赤柱之事其前車也

原狀前段有黃竹岐殺斃洋人六命之事

若以爲他處滋擾

可以挾制粵東俾罷入城之禁不知省會之區衆流所匯設有緩急彼此相援此又同仇敵愾之可信者在貴公使深思遠慮必無不先見及此而肯輕舉妄動耶我等紳士亦知貴公使計必不如是之左特恐不肖之徒播造謠言釀成禍變於以便其借端滋擾之謀殊可寒心耳總之作事貴循天理尤貴順人心天視自我民視天聽自我民聽故民心之向背即可驗天心之從違我

大皇帝以中外爲一家懷柔遠人無分畛域現在欽奉

諭旨亦以民心爲重蓋順民心卽以順天心也且貴國來粵通商歷有年所全靠地利人和方能獲利近年生意冷淡亦由民遭兵燹財窮力竭使然亟宜培養元氣充裕財源貴公使爲國于城各國航海而來無不同深仰望正當圖遠大之計爲外洋各商興利於無窮更不宜以此無益有損之舉而蘄蘄於榮辱計也若能體民察情相安無事則我粵賢士大夫必將敬禮有加卽鄉曲愚民亦必頌揚無已榮莫大焉固遠勝於入城萬萬矣是以欽差大臣徐洞悉輿情確見民心如一公論同符開心見誠直言相告其所以保護貴國之苦心與夫顧全粵民之深意至周且密也何貴公使未之悟耶我等紳士世居省城因見停貿易者不樂其業謀捍衛

者不安其居民情洵洵勢將激變於貴國既爲不利於粵民亦不聊生兩敗俱傷隱憂殊切特將實在情形明白布告貴公使如幡然省悟中止不行我等紳士必當開誠布公勸諭各行戶照舊貿易務使中外商民共敦和好盡釋猜嫌相待以誠相交以信並欽遵

諭旨爲貴國善謀保護之方以期共享昇平之福凡此披肝瀝膽言出至誠事有明徵情無欺飾貴公使固可訪察而知也若仍固執已見不聽良言必將專恃威力妄啓衅端是不顧禮義不講情理則非我等紳士所敢知者耳按此書義正詞嚴且於彼已情形成竹在胸故言之洞中肯綮宜其不戰而屈人之兵也維時仲筮制使以此書附呈

御覽故今全錄其文以資異日史家之攷證云廉訪諱祥光號賓衢廣東番禺縣人道光壬辰進士後任廣西按察使在梧州勦辦江匪以瘁卒按狀咸豐丙辰秋英官巴夏里復申入城之議構衅尋仇焚燒城外民房以數千計十三行洋樓亦毀於火吾粵官紳咸惜廉訪之前卒而粵事之日蹙有以也今前記之

附錄西人月報

近日粵省民人俱不敢與英人往來因怕本地官長異日以通番罪已故英人於破城之後卽屬巡撫出示云云前見英兵入城在衙署內拾得本地人書信一大封其書出自外洋署內辦理文案之廣人因伊在外國入幕探得其事卽以密札遞於本地官長署中又得一據知葉總制所行諸事未能盡合

大清皇上之意

廣省城內外居民恰與英人無大仇怨此似易於講和惟城外九十六村之人大不相合聞英人破陷省城九十六村糾眾會議以爲是役也必洋人賄屬官長而官長利令智昏以致城池之陷易於摧枯今我等擬上京控告糾集人眾以圖剿滅英人聞之議訂期招集九十六村之爲首者入城勸諭以後共相和好倘勸諭之後仍懷宿怨害及英人即屠戮一村以爲九十五村之鑒九十六里即三元里

一帶地方

十二月間有英人行至香港僻野之處輒被粵人劫掠殺害所以

英人不敢在外私行以上皆七年十二月破省城後事

英人於黃埔地方豎一校大旗黃埔之人於夜間將旗繩割斷以

致顛仆因出示令黃埔人交出斬旂之犯次日黃埔人僅將割斷之繩交出斬旂者實已逃竄無蹤至今未獲

現廣省藩臬司鹽運糧道俱在佛山設立衙署辦理事件英官勸其來省不允

英人火輪戰船由加爾各搭地方至港載來天竺兵七百名自後又有船隻載兵來港因英官恐英佛兵勇不耐廣東暑熱故以天竺之兵代守省城

英官在省見廣東巡撫柏潛備裝具欲往佛山遂命兵丁防守巡撫衙署又省城謠言紛起云城外九十六村之人共謀糾合克復城池然亦久無確耗現黃埔一帶中外貿易之事日漸興隆

葉總制初在天竺後又移至加爾各搭地方天竺京城然飲食起居供

應如常以上八年三月以前事

四月二十一日英國武弁聞白雲山有鄉勇防守遂帶領兵丁一百七名出省往查及至該處見鄉勇人多衆寡不敵遂移文至省當夜調兵千名次日會剿而鄉勇已逃逸英人追至數里外即欲折回而英官大怒迫行至日中爲戰傷者五人而受酷暑死者六十餘人

英人初入省時廣人帖服近則詭計日生故英人在省不能十分安全有一日佛官食時見飯中真有毒藥又天竺黑兵被人潛擒至鄉間又香港亦屢受其害又放火以燒英人所居之屋

前說英兵在白雲山擊退鄉兵一案英兵回省有醫生在後外洋出兵皆有醫忽被鄉兵擒去斬首自此該勇等膽氣愈大又得天津大

沽之信愈加忿怒肝膽愈大有花旗佛郎西天竺兵數名都被廣

人殺去以上皆四月事

五月初黃總制蒞任初九日出示極稱贊廣省人民之忠勇其略言道光二十年間予以道銜奉

命來粵歷四年以逮委署臬司曾目擊英人屢欲入城皆被爾等攔阻時予愛爾等民人及民人敬予有如父子兄弟後升任山東臬司以及陝西藩司雖去粵邦數年未嘗一日忘爾等人民之忠勇也今予奉

命來粵不啻舊邦爾等民人亦如見舊主但惜南省一帶河山風景依然如昨而變故多端較之昔日大不相同即如梧州肇慶等處俱有匪徒吾民之苦亦已極矣今又加以洋禍其何以堪竊思

外洋人本以通商爲事今乃不務本業日事攻戰查彼國人數現居省城者不過數千離本國甚遠豈能舉傾國之師而來我中土廣省地方一朝號召雖數萬萬人不難一呼立至此意固明知之目下城廂內外民房半爲英佛所據商賈遷徙民人離散彼亦情知廣人憤怒實深是以在城斂迹不敢外出日夕防守寢食不安且英人量已之力不能取勝而求其舊仇之佛人以助之予恐數年之後佛人亦必受其欺焉花旗人在粵通商多年謹守前約不務攻城予實嘉之現在英人聞我

皇上調集大兵不日可至尙能洗心悔罪我

皇上必寬宥之不然則是冥頑自取罪戾必盡殲之無赦爾軍民有能出資助餉恢復城池者定當一一保奏等因現今廣勇驍健異

常每夜於附郭地方放流星射入城中欲以起火又出賞格示以有能得英佛官之首者賞銀五千兩得兵首者每名賞銀百兩又城中埋窩箭者有之暗地布網者有之目下外國人若無兵丁防守之處不敢游行所有中外人等兩不交易而生意寂然又五月二十日黃埔地方有英國商船在岸上修補夜間有一隊鄉勇踰山而來船主帶兵百名上岸查訪至一村不見一人疑有埋伏遂擊村人三名同往別處查看不料鄉勇伏於隱僻處內藏礮臺忽放礮彈英兵傷者六名船主亦受傷中有一人彈中二十七顆黑暗之中該勇於隱僻處各放一礮潛走莫躡其蹤而其礮甚巨所有村人三名亦被擊斃又二十一日英武弁麾下廚子係天竺人偶行路上忽被人以刀割其首而去時有同行之天竺兵二名

並未見及其神速如此又二十二日有佛人自火輪船上岸往南門買食忽被廣勇圍住二人奪圍而出一人在後頭與手皆被割去後佛人查知其處以兵屠之死者四十三人英人以爲報之太酷也以上五

六月十四日夜四更時分有廣勇七千名忽來城下圍住三門皆駕雲梯而上城門外有一處乃英人巡夜局燒火藥甚多地震三里但未曾害及英人英兵迎擊廣勇敗北死傷者約三百人該勇俱說城內有旗兵助戰故爲所敗時駐防軍械都被英人收去約以兩不相害故廣勇如是云云

佛山紳士出示及英人攻破新安事俱見上以上六以上所記廣勇事最詳其言九十六村之民糾集義勇恢復城池與殷兆鏞所

奏合九十六村者卽三元里之一百三鄉也泥城爲北門咽喉當佛山鎮之要路皆在省城之西北偏佛山之局乃九十六村團練之總匯處也至攻陷新安起於佛山局中禁止華人受雇勒限一月辭退洋人爲之大窘核以是年八月間上海照會之文其銜恨羅侍郎三人欲請先撤其兵權正以此耳又月報內云六月間黃總制出示言中外現議和好爾等民人毋得復相攻戰等語核以五月間激厲廣勇之示諭不免前後矛盾是則制使亦爲廷臣之議撫者掣其肘歟

中西紀事卷之十四

大沽前後之役

江上蹇突

咸豐八年春英法彌俄四國在粵各遣其屬官一員前至江蘇投遞書信即求江蘇制撫轉寄都中相臣尋准照覆令其分別前往粵東及黑龍江聽候欽使查辦語詳前卷中時四國人等已至滬中而英公使額羅金及水師提督並法郎西兵船先後踵至阻之不可遂駛駕火輪兵船由海道徑窺天津三月四國舟泊海口遣人前赴大沽港口投書照會直隸總督譚廷襄請轉達都中相臣直督據以奏聞奉

旨命戶部侍郎宗倫內閣學士兼禮部侍郎烏爾棍泰馳驛赴天津

與直隸總督譚廷襄商辦洋務天津直沽河去海口二百里一日大沽港設有礮臺爲天津門戶港之外有沙洪一道凡海船進者必過沙始得入口船至此輒淺擱不能行當四國投遞照會時制使先遣大沽武弁駕當地小舟導之行遂無阻滯自此洋人數以杉板及小火輪船探水游奕制使以方議欸弗之禁亦不設備遷延二旬洋艘漸熟又以千里鏡遠窺礮臺具悉虛實夏四月彌俄講欸船泊口內英法不俟命遂於初八日二國同駕小火輪船及杉板數十號闖入大沽口內官兵開礮相持不克前路礮臺陷守臺之游擊以下死者八人時副都統富勒登太紮營北岸守後路之礮臺猝聞前軍失利兵勇羸潰所有京營礮位全行遺失亦相繼陷焉

上聞震怒爰逮天津鎮總兵達年大沽協副將德奎等入都革職拏

問直隸提督張殿先亦論劾職奉

旨授託明阿爲直隸提督尋

頒給欽差大臣關防著僧王格林沁馳驛督兵赴天津京師戒嚴五城皆設團防局惠親王主之英人挾兵要撫旣踞礮臺旋欲修好而花俄二國居其間仍以欸議請當宗烏二侍郎之至津也英人謂其非相臣不足以當全權之任蓋英制凡統兵將帥率以五等爵充公使弁以全權官銜示將在外不受中制之義又見白門議欸五口通商皆以相臣總其事於是欽使制使先後通欸概辭不見惟花俄二國與爲往來而已旣罷兵二國復以撫事請奉

上諭著派大學士桂良吏部尙書花沙納等馳驛赴天津查辦事件欽此

維時惠親王綿愉宗室尙書端華大學士彭蘊章等聯銜保奏已革大學士耆英熟悉番情請棄瑕錄用以觀後效上召之入見即日賞給侍郎銜飭卽馳赴天津時直隸總督已行文照會花俄二國使臣同至天津商辦一切是月二十六日西使至津與桂相花尙書相見定撫議也耆相以二十九日抵津往拜英使不見傳言英人與耆相有隙桂相聞之懼撫事之中阻也乃奏請召回耆英以順番情上不悅耆相自天津回行抵通州奉

廷寄飭令仍留天津自行酌辦耆相不卽折回徑由通州入都旋寄信僧邸告以初五日可抵軍營時惠王方自僧營歸途次接據僧邸專差送到耆英信函大驚乃攜至巡防處與宗室大臣同閱僉謂番情巨測官員並未辦有頭緒輒敢藉詞卸肩且未奉

特旨竟擅先自回京奏請

飭下僧格林沁將耆英到營訊明後卽在軍前正法等因奉

上諭耆英畏葸無能大局未定不候特旨擅自回京不惟辜負朕恩亦何顏以對天下是屬自速其死著僧格林沁派員卽將耆英鎖扭押解來京交巡防王大臣軍機大臣會同宗人府刑部嚴訊具奏欽此嗣據訊供奏聞

上謂其擅離差次之罪輕而諉過卸肩之罪大乃傳旨宗人府及刑部尙書宣示

殊諭賜其自盡以全法外之仁自是撫議遂定方桂相之至津也力持撫議而天津之民自三年大挫粵匪之後勇於赴鬥見洋艘停泊海口輒思糾鹽梟海盜乘間搶擄迨相國至津軍民遮謁道左請率

團練助官兵與洋人開仗相國撫而遣之英之謀主曰哩嚨昧者實廣東嘉應州人世効漢奸于外洋遂隨其公使額羅金爲行營參贊聞相國至津不俟照會輒持其所定天津新議凡五十六條自海口至津要相國畫押允行相國辭之數咆哮於欽使廨中以軌撫事之速決正值花俄來津講欵之時有津民與洋人口角鬥歐見哩嚨昧在場幫助遂糾衆生擒謀殺之又謀執而致之相國行營於是欽使及天津總督聞之恐誤撫局亟遣員弁設法解散遂釋哩嚨昧回舟一時廷臣封章連上僉謂番情叵測喜怒不常非大彰撻伐不足以振國威於是通朝自閣臣外六部九卿臺諫之列聯名奏請罷撫語多憤激

上弗之罪也初

上之起者相也召對密幄造膝請陳自稱當此時勢惟有獨任其難上譏諉者再當密諭其自展謨謀不必附合桂良稍涉拘泥蓋欲以撫爲剿也迨者相抵津仍循故智又見英人不禮輒欲藉詞卸肩上始憮然失望是時拊髀擇將意在僧王而礮臺未經修好海防猝難整頓一切戰守機宜諸形棘手適桂相罷兵議撫之奏至並呈送天津新議五十六欵

上謂稅則事宜必須親歷海口相度地宜爰降旨飭令洋艘起旋回上海一面派遣欽使馳驛至江蘇商定稅則事宜六月初六日奉上諭著派桂良花沙納基溥明善攜帶欽差大臣關防馳驛前往江蘇會同何桂清妥議通商稅則事宜欽此時四國聞撫事已成於五月二十五日自天津海口起旋去矣

秋八月二十六日欽差大學士桂良吏部尚書花沙納等抵江蘇之上海時何桂清任兩江總督亦至焉英舟自天津起旋其公使額羅金者汎海至東洋護送日本船隻法彌俄三國使臣及英之叅贊領事人等皆先後來滬是月長星竟天凡十餘日始沒方津門之議撫也咨會到粵粵督請戢兵以俟

命而粵民不共之仇見撫事已定會城不返決背指髮其憤益深時英人在粵之領事揭天津和議曉諭粵民被新安鄉勇執其張示之洋人而殺之英法之據粵者聞其事遂起兵攻新安陷焉侍郎羅惇衍見番禍未艾乃以巡緝土匪爲名請緩撤佛山團練之局由粵督奏聞而該洋人之難端復起欽使到滬之次日即行文照會四國訂期商定稅則事宜旋准照覆內稱兩廣總督黃某暨紳士羅龍蘇三人

辦事欠妥於天津定和之後仍行招勇且徧出賞帖謂有能送領

事巴某之首者賞銀三萬兩甚至開礮傷斃我國兵丁以致不得已

攻陷新安請問是何意見等語

以上皆据原文載入滬商月報中

欽使懼撫事中沮復

又照會稱粵中因江西南贛等處均有賊蹤道塗梗阻以致天津知會未到蓋權詞以答也復准照覆內稱必欲刻期商定稅則先須奏請撤回黃制使及粵中紳士團練之兵欽使不得已許之遂於九月初六七等日來至滬城英所遣者三人哩嚨吠其首也稅則更定之大略已具天津新議各款中此但載明出口進口之貨及洋藥一欸不在此額亦不准十年一修改約凡十條四國所定大略相同名曰通商稅則善後條約額羅金至滬遂於十月日欽差大臣與該四國使臣彼此畫押由該使臣賚回守候國書前至天津呈請換約桂相

等據以奏聞奉

旨依議維時英人以約內有增設長江海口一條欲先察看沿江一帶形勢以定貿易口岸遂於定約後遣水師領事駛駕火輪船由海入江湖流至湖北之漢口鎮踰月而返又法國傳教人等紛紛駛赴各省請設立天主教堂悉賃內地船隻由內河行走地方官不敢詰

是年冬月法國教士自蘇來浙浙撫胡興仁

鼓吹升礮迎入署中又聞其淹留湖上數月

時欽使花尙書等先回京邸桂

相留滬半年督辦善後事宜踰年而有換約淪盟之事

九年夏各國人等駛赴天津換約尋桂相滬中原議告以天津大沽港口現在設防令四國換約之舟改由北塘海口行走各洋人唯唯是時四國分幫入都英舟先抵天津俄羅斯繼之突背前約闖入大沽口直隸總督恆福聞之遣員持約前往趨令改道不省五月二十

四日英人駕舟駛至灘心將截港之鐵鎖用礮炸裂時僧邸已飭官兵嚴防俟其進口擊之越日有小火輪杉板等共十三艘皆豎紅旂挑戰遂將港口鐵鎗拉倒十餘架逼近礮臺開礮轟擊我軍亦放礮相持沈毀其船隻數號餘亦被礮擊損不能行走逃出攔江沙外者一艘而已英人見舟師失利復以步隊接戰經官軍轟斃數百名生擒二名英之兵目李姓受傷即上年隨至天津之哩咽呖也是役也直隸提督及大沽協副將亦受傷陣亡奉

上諭此次洋人受大創全軍覆沒我軍士奮勇異常遂操全勝之算著僧格林沁先在捐輸項下提銀五千兩分別獎賞所有在事文武員弁另行查明保奏陣亡之提督副將等均著交部從優議卹欽此維時洋人震懾

天威稍稍斂戢適彌利堅之舟後至恪遵滬約改道行走呈遞國書
由天津總督具奏

上亦優答之予時僑寓浙東欣聞其事次其大略如右不數月有自
寧波傳來香港月報內稱英兵敗歸修造船隻招募潮勇將以來年
入寇京師等語以爲該洋人挫衄不甘虛聲恫喝浮言之起未必無
因乃未及一年而輦轂之變起矣

大沽兩次之役先負後勝議者以爲先事之備得算較多此以成
敗論者也予閱僧邸奏叅直隸總督譚廷襄摺內稱查取國瑞等
供詞是日前路礮臺失利該督乘輜向西奔走寶屬恇怯無能等
語雖國瑞係後路守臺之員藉詞諉卸所供亦未足深信然當日
前路礮臺實陣亡游擊以下十餘人並非不戰而潰之比况據西

八月報極稱大沽武弁之忠勇至有距躍向前奮勇不顧洋人方
欲生致之者見後若使統禦得人未必不收其效是制使恇怯無能
首先潰逃咎無可諉而其失機疎闊尤在於不守大沽口外之沙
致使洋舟來往自便一旦闖入如駕輕車而就熟路是則門戶一
失雖有智者不能善其後矣况旣敗之後花俄講欵欽使抵津一
切毫無把握而塞港之舟筏不整未占之礮臺無備洋船來往又
復如常此豈堪再戰乎是亦蹈牛制使白門之覆轍而已

者相之起一時中外疑之謂其以昔年議撫得罪之臣一朝嚮用
遂疑撫事之成事由中制子詳繹邸抄綜覈前後實私心臆度之
見也自大沽失利之後勦撫聚訟築室異詞

上見事處萬難特命桂相等前赴天津相機籌辦未嘗一意主撫也

迨耆相召對有獨任其難之語

聖心實深嘉悅意其洞悉番情或別有且款且戰之策故令其不必
附合桂良稍涉拘泥核之後來

硃諭所謂自展謨謀作爲第二步辦法者具見廟算用心之苦迨其
到津因英人不禮奏請召回

上又慮掣該相之肘亟發

廷寄令其仍留天津自酌辦法具見用人使過不惜寬其銜轡之施
而豈意其亟欲卸肩別無機宜之陳奏閱其供摺仍屬羈縻之常
談於是

上始洞鑒其前後居心如出一轍因數其積稔而寘之法天下後世
亦孰不詈其罪之魁而惜其死之晚也予聞上年粵省陷後英人

踞制署搜檢歷年洋務卷宗悉付繙譯官以英文譯出因得於檔
案內見其在粵章奏大半支吾掩飾口是心非故一聞該相復起
頓生疑忌而該相亦自此不能一日安於天津是其賈禍之由殆
天奪之魄又核以王大臣等所訊供詞據稱英人包藏禍心執意
不見者英縱在津於事無濟是以桂良花沙納等奏請召回實爲
通籌洋務全局起見等語於是宗室肅順乘機下石謂其甫抵天
津一被洋人虛言恐嚇不顧大局遽爾奔回遂單銜奏請正法是
則英人一怒實足以速該相之死雖禍幾猝發非其患得患失之
意料所及而暮氣之乘進退失據君子是以知其不終也附錄西
人月報咸豐八年

三月初六七等日外國船隻陸續已抵天津海口中國有小官一

陳姓一張姓前來問訊答云已遣人前去投文矣十一日四國差官到大沽港以書達於直隸總督譚廷襄轉寄滿相裕誠次日中國即有侍郎宗倫內閣學士烏爾棍泰前來花俄二國與之相會據云各國之書已由錢藩司寄上京城十七日譚總制前來英法官聞其無全權不能便宜行事因此不肯見面惟與花俄二國往來

花旂有繙譯官丁姓與領事同至天津又有耶穌教士曹姓同行今曹姓回審據云二月廿五日至滬三月初五日自滬起行初九日至天津海口後數日同英法俄三國及本國領事赴大沽口內投文即有中國武弁多員至杉板船上接去十七日又進泊大沽港內見有礮台三座名曰中南舊上暨旂幟殆徧其下有城色黃而光疑而用千里鏡窺之方知以蘆席作筒實土其中疊以爲城也聞有守兵千名礮六百尊內有紫銅巨礮十二尊防堵極嚴聞日有小舟揚帆而下特至我舟中有游擊陳守備張俱帶藍翎此後亦屢有華官來往我舟所乏即便送來奉以洋銀分文不受又有藩司錢大人來相迎接於是餽送甚多我舟頗不乏用我舟桅工不習水性舟擱於沙即向華官借船一隻分運煤炭以輕之不料英法意見不投遂有四月初八日之事未戰以前十餘日二國講和之小火輪船亦已過沙駛入港內時與中國官來往至戰時回避不及因水淺不能運動以致開礮之時介在其中頗履危險之地又未戰以前官兵截住大沽港口初九日方得駛出港外以後未得其詳

前甯波有英國小火輪船開往天津今於四月初九日自津起程十五日回甯據云本月初八日英法二國在天津大沽口內地方攻打礮臺前幾日有英法小火輪船五隻已過沙駛入港內後又有小火輪六隻帶領杉板小船數隻一同駛入杉板內載英兵法兵共千名其大火輪船皆泊口外大沽口內有礮臺九座設巨礮二百九十門臺上及華營內約有萬人守之英法兵船駛近岸時皆當礮口前惜中國人開礮未能中的彈丸皆自頭上過時火輪小船開礮相禦杉板則駛近岸旁兵弁放鎗以戰約一時有半英人從此岸而登法人從彼岸而登中國兵潰英法兵亦有死傷者惟法人過官兵藏藥之處猝不及覺被礮擊死傷者較多又見中國武弁內有四品頂戴二人一人執旗自刎大眾遂潰

天津後來新聞於四月二十四日來滬內云四國領事俱在天津公館因中國欽差訂定是日中外會議自四月初八日以後並未攻打自大沽至天津來往無阻偶遇淺水亦可雇華舟牽行食用亦可采辦岸上礮臺亦無準備大沽塞港之船隻亦未見整理大約撫事可成今花旗繙譯官丁先生已回甯波伊隨領事至津自投文以至講和均所目擊據云四月初八日之事予見中國兵械雖不甚精而兵弁大都忠勇英法始而用武今又修好四月二十日中國欽差制使行文邀花俄二國領事至天津郡中館於鹽商韓宅房屋寬敞供應周備二十六日會晤全權欽差桂花二大人商定和約二十九日前任兩廣總督耆公亦奉命來津是日實有

國書定接受儀制五月初一日花旗領事捧回寓中即時繙譯花文見中書滿漢文並行初八日花旗領事回拜者公於風神廟初三日耆公回京

又昨接上海寄來香港報云四月初八日之役英兵死者五名傷者十七名法兵死傷者八十八名中國礮臺上所放之礮或以錢作彈又推木簾順流而下以作火攻之具一半爲沙所阻一半被英人撥開故未罹其害惟此地官兵武弁膽略甚壯其堅守礮臺之人三次爲英人礮彈所中三次去而復返又有一弁於英人逼近礮臺時單身從礮臺上跳躍而下前來迎戰英兵不忍相害令生擒此人惜前隊兵丁未聞遽以鎗斃之然此等武弁忠勇異常我外國人亦心慕焉

昨日丁先生來館云接天津最後新聞五月初八日和約已成忽聞

皇上下怒者英謂大局未定不候旨意擅自回京著僧王派員鎖拏解京治罪不知如何辦理查者公先自回京之由因前任兩廣總督任內曾奏告

皇上謂外國人祇可計誘是以用好言哄騙一味奉承中多藐視外國人之語此次耆公來津英法繙譯官將此等奏章當場獻出耆英自覺相對無顏是以迅速回京不料因此賈禍所定和約花俄二國先行畫押十七日英法畫押候至二十五日奏聞

皇上閱後各國兵船便可分駛出口矣

此次所定天津新議英國凡五十六條各國亦有條目已奉准行

但稅則一欸聞

皇上定要遣欽差同四國使臣至滬商定方能換約現已派定桂良等四人於六月初六日奉

上諭云云惟英之公使埃爾謹

即額羅金之轉語

出京先須由海道前赴東洋

日本國送船以昔年與日本定約曾許其照英人火輪船式製送

也埃公使送船事竣仍回上海料彼時欽差到滬當亦不遠

俄羅斯人有在京師者俄之領事向華官言欲邀其至天津一見於是寄居京師之俄人於四月間來至津邸因得備聞都中一切近事

中西紀事卷之十五

江上蹇叟

庚申換約之役

咸豐十年庚申夏六月英吉利法蘭西連兵由海道至天津修上年換約之怨也方上年洋人之敗於天津也泛洋回粵東招募潮勇數千人將以陸路馬隊與北方車騎競長是月英法二國以火輪兵船再泊天津海口時

上方命僧王嚴防大沽口凡南北岸礮臺皆設重兵守之其港口之北曰北塘者大沽之後路也上年以換約令其改道不從衅端遂起海口報至王度其仍由大沽取道抑或徑由北塘襲我後路攻其不備乃以重兵守大沽取道南岸而預伏地雷火礮於北路塘岸間將

俟其入而殲焉有漢奸偵得之以告遂爲洋人所發十五日英法人各駕小火輪船杉板等船探水而入二十日舟過大沽口外之沙洪膠淺不得進懼我軍之乘其間也乃張白旗請款王亦令官兵勿挑戰專爲致人之計以待之二十六日洋舟得水轉動闖入大沽口內旋分兵自北塘後路襲我是時副都統德興阿督兵防守新河洋兵自北塘進官兵拒戰不利全營陷焉於是洋人進占新河二十八日進占唐兒沽時王督師守大沽之北礮臺

上聞津事日棘爰命大學士瑞麟調帶京兵一萬前赴通州相爲犄角

七月五日洋兵自後路襲我大沽之北岸礮臺提督樂善拒戰不克中礮死時僧邸堅守南礮臺未動尋奉

旨飭令退守通州於是鄭親王端華宗室尙書肅順等奏請罷兵議撫並請

召回僧邸以戰洋兵

詔書一日數至王不得已退師次於距通州廿里之張家灣天津不守洋兵長驅而入初七日陷焉

初

上命侍郎文俊前粵海關監督恆祺入津議撫洋人以其官卑不足當全權之任弗見也尋奉

旨改命大學士桂良往是月十五日桂相抵津行文照會該洋商定和約英之全權公使曰額羅金其參贊之官曰巴夏里以書照覆請增軍費准在天津通商並請各國公使酌帶散洋人數十人入京換

約皆巴夏里主之也桂相據以奏

聞

上大怒嚴旨拒絕一面仍飭僧邸瑞相堅守通州以防內犯於是京師戒嚴二十一二等日英法聞和議不就遂自津門派兵北上擾及河西務畿輔大震廷臣復有以撫事請者而一二左右近侍輒張大

洋人之威以聳

聖聽遂有駕幸木蘭舉行秋獮之議先是津門告陷京師五城分派禁兵更番守衛時廷臣以

上常年駐蹕海口非所以備不虞因奏請即日

移幸大內不報迨聞洋氛內逼左右力贊遷避之計請備乘輿法駕

明季百官二十四日奉

硃筆諭內廷王大臣及奏事值日各堂官入

朝待命遂有坐鎮京北之

旨又云將以巡幸之備作為親征之舉於是都下兇懼謠言四起百官庶民各謀遷徙而車馬悉以備

巡行一時之送其孥者徒行奔命於是六部九卿臺諫侍從之列聯銜奏遞封章請

上速定還宮大計不報先是副都統勝保自河南召回偵洋兵將薄通州即日由

中旨傳令該副都統會同貝子綿勳共調帶八旗禁兵萬人前赴通州助勦未行聞

上將遷蹕亦上疏力諫謂不可爲一二奸佞所誤致失天下臣民之望

上意稍解二十八日奉

上諭近因軍務緊要需用車馬紛紛征調不免嘖有煩言朕聞外間浮議竟有謂朕將巡幸木蘭舉行秋獮者以致人心皇惑互相播揚朕爲天下人主當此時勢艱難豈暇乘時觀省果有此舉亦必明降諭旨預行宣示斷未有乘輿所蒞不令天下聞知者爾中外臣民當可共諒所有軍裝備用車馬著欽派王大臣等傳諭各處卽行分別發還毋得盡行扣留守候以息浮議而定人心欽此尋又奉

特頒硃諭速發內帑銀二十萬兩賞給巡防弁兵都下人心爲之一定

八月初一日洋兵自河西務徑薄張家灣遂逼通州時

上命怡親王載垣續赴通州議欵桂相及軍機大臣穆蔭皆在焉英官額羅金旣得照會乃遣其參贊巴夏里督帶散洋人數十人入城議和初二日怡王等與巴夏里相見曲意開導巴請仍循天津原議並須邀法國使臣同來會商初三日怡邸宴英法使臣於通州之東嶽廟穆蔭恆祺傳賓主之命於樽俎間法使唯唯無異詞酒數巡巴夏里攘袂而起曰今日之約須面見

大皇帝以昭誠信然我國自見天主教外無跪禮王其許我乎王默然巴又曰遠方慕義欲觀光上國久矣且賓主之禮不可無以肅觀瞻請以軍容入穆蔭問人數幾何答曰每國須二千人其餘大隊悉留通州穆以告王王見其語不遜姑答以此事須請

旨定奪未敢專許也巴艱然久之語恆祺曰我倦矣速取臥具來恆不得已爲之設榻後有所語巴輒佯睡不聞穆蔭請王暫逗留恆祺伴焉黎明有馳告王曰洋人有異志難將作矣蓋是夕已有奸細闖入城中到處窺伺王亟遣恆祺偵額羅金則衷甲將襲我王知事已決裂密知會僧邸設法擒巴夏里解送京師以法使尙爲恭順仍理遣之然兵端自此起矣

初副都統勝保奉督師之

旨與貝子綿勳調集京兵以俟後命

前旨係內傳故其奏內言未奉諭旨明文無從布置時

聖意猶欲觀望和議之成否以取進止適通州奏至始奉廷寄密諭勝保等謂據怡親王載垣奏稱洋人猖獗堅欲攜帶大隊赴通朕意與之決戰該副都統即日簡練精兵帶赴通州以西駐紮等因都統得

旨乃以初三日出師駐朝陽門外

即齊化門

七里之燕雲寺越日次定福

莊值英法兵已入通州僧瑞二軍拒戰失利洋人長驅而北我軍馬步隊沿途潰散時勝保督師禦於八里橋之南首初七日洋兵自郭家阪一帶分其軍爲三僧邸趨其西瑞相遮其東皆敗焉都統自南路趨剿亟麾擡鎗排擊不克有頃見洋人鎗礮橫空飛墮中勝保之左頰右脛而顛衆軍曳而起不能軍左次定福莊洋兵追及之禁兵皆棄甲走都統亦退入城中洋兵遂踞定福莊時僧瑞二軍退守齊化門

上在圓明園聞寇薄都城各營皆潰深知禁兵之不足恃於是王大臣等請堅守京師

移幸大內不許遂定北狩之計

初八日寅卯間

乘輿啓蹕六宮及諸王從焉於是鄭親王端華宗室尚書肅順軍機大臣穆蔭匡源杜翰皆奉傳

旨扈蹕時洋人偵知

翠華在外徑率番兵潮勇繞城三匝禁城內外隔絕凡半日不知上之所之京師大震有聞始奉到

巡幸灤陽之旨人心稍定尋奉

硃諭著恭親王奕訢留守仍督僧端二軍駐師海淀越日又

頒給全權大臣官銜從洋志也於是撫議復起初九日

行在旨步軍統領著文祥署理代鄭王也是時團防大臣大學士周

祖培尚書陳孚恩侍郎潘曾瑩宋晉等會集中州會館議團練城守事宜自初八日各門晝閉米蔬概不許入城百物翔踊城中之遷徙者皆以重賄賂司門先後出王大臣等懼激內變議暫開西直門通往來過午卽局之初十日正陽門半開有頃亦局之是時恭王桂相皆駐城外城中無主英人聲言攻城又索巴夏重甚急恆祺請釋之以平洋人怒值都統勝保請假在都亟致書當事以爲不可侍郎黃宗漢奏請殺之諸王大臣等皆不能決也

十一日副都統勝保自都中由八百里驛奏

行在請飛召南軍入援於是勤王之詔始下是日由軍機寄奉

上諭據勝保奏稱用兵之道全貴以長擊短洋人專以火器見長若我軍能奮身撲進兵刃相接賊之鎗礮近无可施必能大捷蒙古京

旂兵丁不能奮身擊刺惟川楚健勇能俯身蹂進與賊相搏洋人定可大受懲創請飭下袁甲三等於川楚勇中挑選得力若干名派員管帶即日起程赴京以解危急等語洋人犯順奪我大沽礮臺占踞天津撫議未成現已帶兵至通州以西距京咫尺僧格林沁等兵屢失利都城情形萬分危急現在外軍營川楚各勇均甚得力著曾國藩袁甲三各挑川楚精勇二三千名卽令鮑超張得勝管帶並著慶廉於新募彝勇及各起川楚勇中挑選得力數千名卽派副將黃得魁游擊趙喜義管帶安徽苗練向稱勇敢著翁同書傅振邦飭令苗沛霖遴選練丁數千名派妥員管帶均著兼程前進尅日赴京交勝保調遣勿得藉詞延宕坐視君國之急惟有殷盼大兵雲集迅掃逆氛同膺懋賞是爲至要將由六百里加緊各諭令知之欽此是時洋

人以恭王新奉全權之命投給照會限三日內交還巴夏里否則十五日攻城王初次照復令其退至天津再行議和不許又令退至通州俟換約後卽將巴夏里送還又不答然洋人終以巴夏里之故攻城稍緩遂移兵繞過德勝門謀窺伺海淀矣

十五日奉

行在上諭留京王大臣著豫親王義道大學士桂良協辦大學士戶部尚書周祖培吏部尚書全慶義道全慶著在紫禁城周祖培著仍在城外桂良著仍在城外欽此是時

上駐蹕密雲之羅山奉

旨著軍機章京曾協均等六人同赴行在

二十日洋人聲言攻海澱僧邸自朝陽門移師北守恭王桂相皆在園中時有京師商人備牛羊千頭赴洋軍犒師且請和議英官答曰此國中大事非爾商人所得聞也必欲以和議請者須恭王自來於是恆祺再請釋巴夏里王不決越二日洋兵自朝陽門移師過德勝門北攻海澱禁兵不戰而潰僧瑞二軍亦潰焉二十四日洋人僭居御園恭王避居廣寧門外之長新店瑞相及步軍統領文祥從焉爰釋巴夏里命恆祺送歸約以次日議和巴既出洋人益無顧忌時海澱民房先後被焚火光燭天巴怒未已請毀御園宮殿洋兵潮勇縱掠園中回師駐安定門外上駐蹕灤陽留京之王大臣等合詞奏請飭恭王入城速定撫議王既奉

欽差全權大臣之命洋官照會趣之入城城中自豫王以下復屢請之初三日恭王移駐廣寧門外之天寧寺進退猶豫適自

行在密寄硃諭謂此時斷難入城辦撫令且擇地駐紮蓋慮英人中變將執之以爲質也英人既入巴夏里首定後約除八年五十六款照行外續增九條法人之約除八年四十二條照外續增十條大意在加索賂款多占馬頭及天津通商京師寄住之事王不能難許其奏請

聖裁俟奉到

批回卽行訂期換約洋人唯唯聽從未幾而構怨之師復起

初怡王之擒巴夏里於通州也並其散衆數十人悉繫送京師經刑部訊供監禁大宛兩縣獄至是以議和釋之歸有監繫在獄者十餘

人英官憤甚將淪盟與師王大臣等亟遣人謝之不可初四日洋兵再擾海澱又焚景山昆明湖一帶火三晝夜不絕京師內外大恐恭王時已移駐城外法源寺洋人復聲言稱兵擾 紫禁城城門洞開洋兵內呼外應勢且岌岌恭王再以和議請法使噶羅居閤排解凡三返乃索死者撫卹款五十萬相約罷兵王遣恆祺往請換約之期洋官照復須俟卹款交清然後蒞盟爰括京師內外庫以初九日照數給訖乃議宴該酋於禮部交換和約初十日巴夏里來訂次日換約之期隨帶散衆百餘人身藏兵械入城周視日晡仍自安定門出一時內外居民觀者如堵而洋人方耀兵於輦轂之下弗之禁也十一日與英人交換和約恭王率大學士賈禎周祖培尙書趙光陳孚恩侍郎潘曾瑩宋晉等各帶護衛入城其各營禁兵皆止正陽門外宴洋官於禮部大堂設供宴上方左右三席東西兩楹各十席日午英官額羅金巴夏里等人自安定門盛陳兵衛鼓吹前導雜以西樂其官皆乘八人輿餘四人王大臣等迎於門外分東西階入席洋官見王用免冠禮王拱手答之又有西女三人行賓主禮徑乘輿入坐或曰洋官之妻巴夏里之婦預焉莫能詳也恭邸與英官額羅分左右坐通事傳賓主之命於樽俎間禮成換約而去十二日王大臣等與法人換約法使噶羅隨帶通事散衆入城皆乘四人輿導以鼓吹亦有西女數人兼設女樂如打花鼓式用西禮也宴於禮部大堂禮成換約如英官相見之儀和議既成英法使臣請將前後條約頒行各省大吏按照辦理王據以奏聞奉
上諭恭親王奕訢等奏互換和約一摺本月十一二等日業經恭親

王將八年所定和約及本年續約與英法兩國互約所有和約內所定條款均著逐款允准行諸久遠從此永息干戈共敦和好彼此相安以信各無猜疑其約內應行各事宜卽著通行各省督撫大吏一體按照辦理欽此

十七日與俄羅斯換約俄之使臣伊格那替業幅與王大臣等相見所定和約議此後通商不論恰克圖及現准英法二國通商之各海口悉聽該國水陸自便其通商條款稅則事宜大略與英法同惟續增條約則意在申定兩國邊界凡黑龍江及西疆交界之處應各派大臣秉公查勘以防異日爭端恭王皆許之其相見及換約儀注皆如英法二國之儀

十月在京王大臣等以和議成合疏請

上回蹕奉

上諭本年天氣漸屆嚴寒朕擬暫緩回京俟明春再降諭旨欽此是時晉撫奏請西遷湖廣總督大學士官文又上疏請於陝代之間暫設

行在俟洋兵全行退出大沽口外然後奉迎返蹕皆不報

是役邸抄多不具大沽礮臺之破津門之陷皆無一語及之僧邸拔去三眼花翎旋奉

賞還亦不詳其用兵之利鈍其七月二十四二十八日之殊諭皆得自都中所寄予以九月杪至祁門督師幕府正值籌辦北援及南軍退守一切情形僅於

廷寄及勝帥咨會中得悉北事之大略其後由湖北嚴方伯樹森寄來天津總糧臺一信又得都中寄督師信函續又傳抄勝帥致周仲建書及其將赴通州請

乘輿還宮疏並六部九卿等諫

幸木蘭疏督師屬彙輯之爲一帙乃得參考前後次其匡略以上云云無一字得之稗野者惟當此乾坤震撼滄海橫流全在斷鞅攀檻之儔瀝血叩心憂危入

告不避文字之忌故今悉據實書之不敢誣亦不敢諱也京兵禁旅其爲綠營者不過十之一餘皆八旗蒙古也

國家承平二百餘年優游輩轂之下皆藉所得月餉以餬其口瞻其一家少者壯壯者老不復知有金革之事固已恬然自忘其爲兵

矣今觀天津通州之役一戰而蹶者十之二三不戰而潰者十之六七是滿蒙之衆非但不可以

龍興例卽求如閩粵川楚之綠營於行陣稍有閱歷者亦相去遠甚卽使

乘輿決計還宮曾無轉念亦恐難免以賊虜貽

君父憂也戰之不克遂爲言和者口實而豈知今日之誤正誤於二十年前撫事之濫觴耶白門之約予取予求不汝瑕疵遂爲洋人得步進步之漸迨至粵東辦理五口通商則裕制府詆琦相所謂事洋人如頑父惟恐不當其意者入城之約許以二年粵中之禍遂始於此粵事決裂而後天津畿輔鼓其狂瀾煽其逆醜以致禁城喋血

君父蒙塵君子觀於洋事之究竟未嘗不歎息痛恨於夫已氏也雖然八年之役

上拊髀擇將而寄之僧邸一年之間成效見焉今雖失利安知異日之不轉敗爲勝邪乃事未劇方堅守南路礮臺而奏請班師力贊遷蹕之浮議起追念

龍飛之初驅逐洋艘罷斥議撫諸臣海內又安者七八年一旦因時事日艱內外諸臣未能堅其匪席之旨而欲狃於處堂之安於是一誤於者英再誤於端華肅順而卒莫能善其後也嗚呼可勝慨哉

附錄九卿科道諫

幸木蘭疏

奏爲迫切瀝陳仰祈

聖鑒事本月二十四日

命內廷王大臣及奏事各堂官閱看

硃筆有暫幸木蘭之說臣等傳聞之下實深皇該竊惟京邸爲根本重地

社稷宗廟百官萬民之所在

皇上一旦爲巡幸之舉則人心搖動京師必不能守且八旗綠營官

兵其父母妻子室廬墳墓皆在京城能保其無離散之心乎萬一

六龍雲駕而兵心瓦解此時欲進不能欲歸不得

皇上將何以處此現在洋人犯順要求百端其實西兵不過二萬餘人耳其斷不能擾吾疆土也明甚若使

乘輿一動則大勢渙散洋人藉口安民必至立一人以主中國若契丹之立石敬瑭金人之立張邦昌則二百餘年

祖宗經營締造之天下一旦拱手授之他人

先帝付託之謂何

皇上何以對

列聖在天之靈乎且以一府一縣之守令聞警出城地方立見潰散

况

萬乘之尊都城之重而可輕於舍去乎臣聞嘉慶十八年林清之役仁宗睿皇帝方幸木蘭聞警即日反蹕當日且聞警而還宮此時豈聞警而出幸乎况現在逆勢不及當日各路教匪之猖獗奈何輕棄根本自貽隕越耶臣等謹按北宋牟駝岡之役白時忠李邦彥

等請幸襄鄧以避敵鋒李綱力主守城之說遂以却敵前明土木之變徐埕主南遷于謙曰京師天下根本一動則大事去矣遂立十八團營而京師安定此不遷而存者也金哀宗奔河北而金亡元順帝奔和林而元亡此播遷而亡者也前史具在遷與不遷其效可睹今日之事萬不至如前史之甚獨奈何出此下策自取貽危哉爲此策者必曰

聖駕時巡仍派重臣監國俟掃盪廓清奉迎反蹕殊不知

皇上一出都城無主伏莽生心蕭牆變起種種危亡翹足可待又安往有掃盪廓清之日况木蘭一隅又何足恃我能往寇亦能往設逆人以勁旅相追則以有所憑藉之京城轉以爲未能抵禦豈中途人心潰散而能資其得力此不待計而決者也昨奉

宣示諸臣京城內外傳說紛紛聞井驚皇人無固志恐滋內變不可
不防仰懇

皇上暫行還宮激厲將士嚴籌守備以固衆志而釋羣疑並求

宸衷內斷不爲浮言所惑

宗社幸甚臣民幸甚臣等受恩深重未敢緘默激切冒陳自忘狂慙
敢乞

皇上聖鑒不勝悚皇屏營之至謹奏

